



KOMUNIKADU IMPRENSA

Kontratu Fahe Produsaun (KFP) TL-OT-22-22

Autoridade Nacional Petróleu (ANP) ho kontente hakarak anúnsia ba públiku katak, tuir Artigu 10 hosi Lei Nu.6/2019, lora 4 fulan Dezembru, alterasaun daruak husi Lei Nu. 13/2005, lora 2 fulan Setembru, kona-ba Atividade Petrolíferu, no Artigu 3.1 no 26.1 husi Dekretu-Lei Nu.62/2023 lora 6 fulan Setembru, alterasaun datoluk husi Dekretu-Lei Nu. 20/2008 lora 19 fulan Juñu kona-ba estabesimentu ANP, ne'ebé fó dalan ba ANP representa Ministeriu atu bele asina KFP ho HTS Exploration Ltd (HTS) atu hala'o atividade esplorasun iha Área Kontratu ba Bloku F. Atu bele hatene klaru kona-ba Área Kontratu KFP TL-OT-22-22, halo favor refere ba mapa area KFP TL-OT-22-22 aneksa iha dokumentus ne'e.

HTS maka kompañia ba esplorasun no produsaun mina-rai no gás husi nasaun Kazakistaun. HTS mós sai na'in ba kampu mina-rai no gás balun iha Kazakistaun inklui fornese sernisu esplorasun no produsaun iha rejiaun ne'e.

KFP preve partisipasaun Estadu nian iha Operasaun Petrolíferu atravez kompañia estatal TIMOR GAP E.P, ne'ebé ninia partisipasaun bele hahu'u husi faze esplorasun ka iha faze desenvolvimentu, haktuir ba termu sira husi KFP no Artigu 22 husi Lei Atividade Petrolíferu.

HTS iha kompromisu atu ezekuta nia obrigasaun sira tuir KFP ba kompromisu sira iha esplorasun no konteúdu lokál tuir termu sira KFP nian no Dekretu-Lei Nu. 18/2020 lora 13 fulan Maiu kona-ba Operasaun Petróleu iha Rai-Maran. Programa serbisu esplorasun mínimu (primeiru periodu esplorasun) mak hanesan tuir mai:

- Tinan dahuluk: Re-entrada (*re-entry*) fali posu sira ne'ebé eziste ona iha Área Kontratu, hala'o perfilmagem ba posu revestidu, no integridade ba posu, análise no avalia dados Jeolójiku no Jeofísiku.
- Tinan daruak: Akizisaun 3D sísmiku ou 3D perfis sísmiku vertikal (*Vertical seismic profiling*) 3325 metrus, 100 kilómetrus liña dados 2D sísmiku ho prosesamentu sísmiku, teste ba posu (*well testing*), peskiza asidifikasaun, no análise kímika fluidu.
- Tinan datoluk: Komprimisiu perfurasaun ba posu esplorasun rua (2) ne'ebé sei hala'o liu husi *sidetrack* ida (1) no posu foun ida (1), ka *sidetrack* rua (2), ka posu foun rua (2) sekari *sidetracking* teknikamente la viavel ; ho kle'an mínimu metru 2000 *true vertical depth* (TVD) ba posu foun ka metru 2000 *measured depth* (MD) ba posu *sidetrack*.

Liu husi Promosaun Lisensiamentu Segunda Ronda 2019/2022, HTS hatudu interese hodi hatama sira-nia proposta ba Bloku F. Hafoin liu hosi konkursu ne'ebé kompetitivu no avaliasaun internal husi ANP, HTS sai hanesan manán-nain ba Bloku F, ne'ebé loke dalan ba negosiasaun kona-ba termu no kondisaun sira husi KFP ne'ebé asina ona.

Ho susesu bo'ot ida ne'e hatudu katak Governu Timor-Leste, liu husi Ministeriu Petróleu no Rekursu Minerais ne'ebé representa husi ANP iha relasaun ida ne'ebé diak ho HTS atu dezenvolve indústria petróleu iha Timor-Leste. Ami hato'o ami-nia dezeju susesu tomak ba HTS iha nia primeiru periodu esplorasun nian.


Aneksu

Área Kontratu KFP TL-OT-22-22


DEMOCRATIC REPUBLIC OF TIMOR-LESTE CURRENT CONTRACT AREAS



124°0'0"E 125°0'0"E 126°0'0"E 127°0'0"E 128°0'0"E



Legend
PSC TL-OT-22-22
Timor-Leste's Maritime Boundary



KONTAKTU AMI

anp.publicinquiry@anp.tl

www.anpm.tl